

PARADA NA SAN NICOLAS TABATA HOPI ORDENA

ORANJESTAD(AAN)—
Compara cu añanan anterior y compara cu e parada di Diadomingo na Playa, e aña aki e parada na San Nicolas tabata hopi ordena.

Si tur aña por a tende cu e publico tabata bula den e parada den nan entusiasmo pa balia ariba ritmo di steelband, brassband of conhuntio, e aña aki, esaki no tabata e caso, y e publico a balia canto di caminda.

E parada di carnaval tambe tabata mas grandi e aña aki cu 13 grupo, mientras cu aña pasa ta 9 a participa.

Na San Nicolas a participa Silvia Lourens, Jaycees, Wild World of Animals, Aabbaa, Cuniqueronan den bacanal, Fiesta Romano, Paraloco, Punks, Beestenbende di mariniers, Montezuma di Esso, Culture, Aruba Defense, Jaycees world congress y un grupo comico.

E total di participante nan tabata poco mas di 800 di aña pasa, ya cu tabata tin grupo mas chiquito tambe. Tabata tin na San Nicolas 12 carosa cu doble di aña pasa, Body

piecenan tambe tabata mas cu doble, considerando cu Montezuma a bini cu 8 roadpiece y 18 body piece normal locual so a surpasa e 16 nan di aña pasa. Tabata tin 41 body piece, pero locual si a baha tambe tabata e musica.

A participa S-United, Time y Akai Brass, Blues Brass band, Grasshopper band, Jamming Brass y brassband di Rufo Odor y Invadors Steelband di Connor.

Na San Nicolas un grupo cu a ser hopi comenta y cu tabata un di e gruponan di mas bunita tabata Cuniqueronan den bacanal, cual grupo a gana e premio di Grupo folklorico original. E grupo aki no a participa na Playa y si esey tabata e caso lo a gana varios premio sigur como tipico of folklorico.

Na San Nicolas, Fiesta Romano a gana e premio di grupo historico, Cuniqueronan a gana premio di grupo original folklorico, Paraloco cu su Lago a bini Aruba, y cantina Hija del Dia a gana premio di grupo comercial, ya cu nan a participa cu grupo tambe,

Montezuma a gana e premio di grupo Luhoso y Aabbaa a gana premio di original.

Den carosanan, Fiesta Romano a gana premio di carosa historico, Mesa di Congreso di Jaycees a gana premio original, Hija del Dia a gana premio di carosa comico, Lago a gana premio di carosa comercial Premio pa flota luhoso a bay pa Montezuma carosa di reinanan.

Premionan individual a

ser gana pa "Montezuma" como historico, Juez di Aabbaa como original, Carnaval 28 su morocho, e reina (masculino), comercial, e pareha Black and White cu e dos cachonan, y luhoso e joven cu e Eagle y e jaguar di grupo Montezuma.

Prijs di fantasia a bay pa Culture Raycan, y Punks prijsnan special a bay pa Fireman Esso Oranjestad, Aruba Defense, Jaycees World Congress, Raad van

Elf di Mariniers cu Prins Louk 1, Eagle grandi di Montezuma, carosa di reina di Mariniers, y pa Max Reemnet.

Grupo mas anima na San Nicolas tabata Bankanaden cu Fiesta Romano, cual grupo a gana premio di San Nicolas Business Association, y grupo mas grandi na San Nicolas a resulta Montezuma cu a gana tambe e premio di Botica San Lucas, Botica Oduber y Visser Trading.

EXAGERACIONAN DI CARNAVAL

ORANJESTAD(AAN)—
E aña aki miembronan di jurado a dicidi pa 'screen' varios di e gruponan di carnaval, pa locual ta trata valor di disfraz, carosa of balor total di grupo etc. relaciona cu e hecho cu den añanan anterior a ser demostrá cu hopi ta ser exagera.

Tambe a screen e total di participantenan cu e gru-

ponan ta inscribi na SAC.

A bin resulta cu tin grupo cu ta inscribi cu cierto candidat di hende, y durante parada na San Nicolas nan ta bisa cu awe tin tanto hende, pero mañan nos ta completo cu tanto.

Varios miembro di hurado a tuma e anotacionnan pa check y a resulta cu exageracion tabata grandi.

Un grupo por ehemplo ta inscribi na SAC cu 200 hende. Diasabra na San Nicolas bo ta tende: "Awe nos tin 150 hende, pero mañan nos ta completo cu 200". Lideman di e grupo ta bisa: "Awe nos tin 60 hende, pero mañan nos lo tin 120."

Ora check back, ta bin resulta cu Diasabra e grupo tabata tin 50 pa 60, hende pero Diadomingo e grupo tabata tin mas o menos 100 hende. Ta e averahe nan aki cu cada miembro di jurado cu haci conteo drenta cune ta ser usa tambe como cifra.

Di un persona bo ta tende, "Mi costum a sali en total 400 florin." Un otro di e mes grupo, bisti mescos ta bisa: "Tur nos disfraznan a ser cosi tal y tal caminda y nan a sali nos

100 pa 150 florin". Lider di grupo ta bisa cu un costum a costa 300 florin y e participantenan ta duna otro cifranan.

Tabata tin un individual cu a laga sa cu su costum a coste 1600 florin. Un ayudante (famia di dje) ta splica despues: "Den un dia nos a traha e costum aki convirtiendo un disfraz bieuw y nos gasto no tabata mas di 50 florin."

Tin grupo cu ta bisa: "Nos a traha 3 luna ariba nos carosa". Pero despues ta tende: "Nos a traha ariba e carosa aki e ultimo 4 dianan. Tres luna pasa nos a cuminsa cu e prome pasonan. Cada Weekend nos a haci algo chiquito."

Un grupo a laga sa na San Nicolas: "Nos ta 50 hende, pero awe nos tin 25". Ora conta a resulta cu ta 8 participante tin den e grupo. Lider ta bisa despues: "Nos a bin cu 30 hende pero nan a bay join otro grupo."

Diadomingo, e mes grupo tabata tin 11 persona, pero Lider ta inscribi na SAC cu grupo grandi, bisa juradonan e tin 40 hende y ta participa Diadomingo cu 9 hende.